

- Neslužbeni prečišćeni tekst -

ZAKON O REGISTRU VRIJEDNOSNIH PAPIRA

I - OPĆE ODREDBE

Član 1.

Ovim zakonom osniva se Registar vrijednosnih papira, uređuju se osnivanje, pravni status, osnovni kapital, djelatnost i organi organizacije za poslove registra vrijednosnih papira (u daljem tekstu: Registar) u Federaciji Bosne i Hercegovine (u daljem tekstu: Federacija).

Član 2.

Registar obavlja poslove registracije, čuvanja i održavanja podataka o vrijednosnim papirima i poslove prenosa, u skladu sa zakonom kojim se uređuje emisija i promet vrijednosnih papira.

Pored poslova iz stava 1. ovog člana Registar može obavljati i poslove u funkciji prebijanja i poravnanja i s tim povezane poslove, po odobrenju Komisije za vrijednosne papire Federacije Bosne i Hercegovine.

II - OSNIVANJE, PRAVNI STATUS I OSNOVNI KAPITAL

Član 3.

Registar se osniva kao dioničko društvo za obavljanje poslova iz člana 2. ovog zakona.

Naziv Registra je: "Registar vrijednosnih papira u Federaciji Bosne i Hercegovine", dioničko društvo, Sarajevo.

Skraćeni naziv Registra je: "Registar vrijednosnih papira", d.d. Sarajevo.

Sjedište Registra je u Sarajevu. Registar može imati urede van mjesta sjedišta.

Registar ima pečat koji sadrži grb Federacije i latinicom ispisan tekst: "Bosna i Hercegovina Federacija Bosne i Hercegovine Registar vrijednosnih papira".

Član 4.

Osnovni kapital Registra iznosi 100.000 (stotinu hiljada) KM, koji u cijelosti obezbjeđuje Federacija, uplatom u novcu.

Osnovni kapital Registra je podijeljen na 1.000 (hiljadu) dionica nominalne vrijednosti 100 (stotinu) KM.

Dionice Registra glase na ime i mogu se prenositi na osnovu odobrenja Komisije za vrijednosne papire u Federaciji (u daljem tekstu: Komisija).

Za izdavanje dionica iz stava 2. ovog člana nije potrebno odobrenje Komisije, a nove dionice Registar izdaje uz odobrenje Komisije, u skladu sa zakonom.

Član 5.

Na Registar se primjenjuju odredbe zakona kojim se uređuje osnivanje, poslovanje i upravljanje dioničkog društva, ukoliko nije drugačije određeno ovim zakonom.

Upravljačka prava po osnovu dionica iz člana 4. ovog zakona u ime Federacije vrši Komisija.

Spajanje, pripajanje, podjela, promjena oblika, prestanak, promjena firme ili sjedišta Registra mogu se vršiti samo ovim Zakonom.

Član 6.

Dionice u vlasništvu Federacije iz člana 4. ovog Zakona ponudit će se na prodaju pravnim licima u privatnom vlasništvu na način i u roku koji odredi Komisija, imajući u vidu dostignuti stepen razvoja tržišta kapitala.

U skladu sa stavom 1. ovog člana Komisija će pripremiti i usvojiti plan privatizacije Registra.

Pravna lica čija je jedina djelatnost posredovanje u prometu vrijednosnih papira (u daljem tekstu: profesionalni posrednici), društva za upravljanje fondovima i druga pravna lica koja odredi Komisija, dužna su otkupiti dionice Federacije iz člana 4. ovog zakona, u rokovima, iznosu i po cijeni koje utvrdi Komisija.

Dionice iz člana 4. ovog zakona u ime Federacije prodaje Komisija, a prihod ostvaren prodajom dionica pripada budžetu Federacije.

Član 7.

Pravnom licu koje ne otkupi dionice Registra u skladu sa članom 6. stav 3. ovog zakona, ili otkupljene dionice Registra prenese bez odobrenja Komisije, Komisija može ukinuti dozvolu za obavljanje poslova profesionalnog posrednika ili obustaviti njegove aktivnosti u prometu vrijednosnih papira.

III - ORGANI REGISTRA

Član 8.

Organi Registra su Skupština i Nadzorni odbor.

Član 9.

Prva Skupština Registra saziva se najkasnije 30 dana od dana kada je otkupljeno 10% dionica Federacije iz člana 4. ovog zakona.

Član 10.

Nadzorni odbor Registra čine predsjednik i četiri člana.

Jednog člana Nadzornog odbora u prvom mandatu imenuje Komisija iz reda inozemnih stručnjaka.

Nadzorni odbor s mandatom do Prve skupštine imenuje Komisija, najkasnije 30 dana od dana imenovanja Komisije.

Nadzorni odbor na prvoj sjednici usvaja Statut Registra, koji se primjenjuje do Prve skupštine Registra.

Član 11.

Predsjednik i članovi Nadzornog odbora ne mogu:

1. biti međusobno u braku ili srodstvu u uspravnoj liniji niti u pobočnoj liniji ili po tazbini zaključno s trećim stepenom;
2. biti lica krivično kažnjavana za radnje nespojive sa dužnosću u Nadzornom odboru;
3. biti članovi organa zakonodavne, izvršne ili sudske vlasti, ili nadzornog odbora pravnog lica iz člana 6. stav 3. ovog zakona, banke, investicionog fonda, penzionog fonda i osiguravajućeg društva;
4. posjedovati, direktno ili indirektno, više od 5% vrijednosnih papira pravnog lica iz člana 6. stav 3. ovog zakona, banke, društva za upravljanje fondovima, investicionog fonda, penzionog fonda i osiguravajućeg društva;
5. obavljati dužnosti u političkoj stranci;
6. učestvovati u političkim aktivnostima
7. obavljati aktivnosti koje nisu u skladu sa principima zaštite investitora i neovisnosti Registra.

Član 12.

Predsjednik i članovi Nadzornog odbora imenuju se uz njihovu pismenu saglasnost.

Pismenom saglasnošću iz stava 1. ovog člana, kandidat za predsjednika i člana Nadzornog odbora koji obavlja dužnost iz člana 11. tačke 3. ovog zakona, napušta dužnost ili suspenduje članstvo za vrijeme mandata u Nadzornom odboru.

Član 12.a

Komisija nadzire rad i poslovanje Registra i primjenu propisa koji se odnose na rad i obavljanje poslova Registra.

Član 12.b

Komisija odobrava statut i opće akte, uključujući njihove izmjene i dopune koje se odnose na pravila rada i poslovanja, internu kontrolu, tarife naknada i druga pravila obavljanja poslova iz nadležnosti Registra, kako bi se osiguralo njegovo poslovanje u skladu sa zakonom i drugim propisima, pravedan pristup uslugama Registra i sigurno i efikasno obavljanje poslova Registra.

Član 12.c

Komisija može propisati pravila koja je Registar obavezan primjenjivati, a koja se odnose na: vođenje evidencija, kapital, garancije poravnjenja, distribuciju dividende, internu kontrolu, obaveze obavještanja Komisije i javnosti, nadzor od Komisije, postupanje po žalbama na rad Registra i druga pitanja koja se odnose na rad i obavljanje poslova Registra.

Član 12.d

Komisija daje prethodnu saglasnost na izbor direktora i zamjenika direktora Registra.

U slučajevima kada ustanovi da postoji odgovornost direktora ili zamjenika direktora Registra za kršenje zakona i drugih propisa, Komisija može predložiti Nadzornom odboru Registra njihovo smjenjivanje .

Član 12.e

U slučajevima kada ustanovi da postoji odgovornost ovlaštenih lica ili zaposlenika Registra za kršenje zakona i drugih propisa, Komisija može zahtijevati otklanjanje nezakonitosti i nepravilnosti ili naložiti odgovornom licu Registra da suspenduje sa posla ovlašteno lice ili zaposlenika do okončanja postupka pred nadležnim organom ili sudom.

IV - PRIJELAZNE I ZAVRSNE ODREDBE

Član 13.

Premijer i zamjenik premijera Vlade Federacije će u roku 30 dana od dana stupanja na snagu ovog zakona, imenovati Privremenog direktora i zamjenika direktora Registra, sa mandatom do imenovanja direktora u skladu sa Statutom Registra.

Privremeni direktor ovlašten je i odgovoran da obavlja poslove u cilju stvaranja tehničkih, organizacionih i administrativnih uslova za poslovanje Registra.

Član 14.

Danom stupanja na snagu ovog zakona prestaje primjena zakona i drugih propisa koji su regulisali ovu materiju, a primjenjivali su se na teritoriji Federacije do dana stupanja na snagu ovog zakona.

Član 15.

Ovaj zakon stupa na snagu osmog dana od dana objavljivanja u "Službenim novinama Federacije BiH".

